

欽定大清會典事例

欽定大清會典事例卷五百

禮部

救護

日月食救護

行在日月食救護

日月食救護。○順治二年定。月食。救護於中軍都督府。○三年定。日食前期由部具題。在京文武各官。均赴禮部救護。用勘合分行直省各官。均於本衙門救護。其勘合字號。直隸用雨字。山東格字。山西致字。河南正字。江南雲字。江西準字。福建皆字。浙江以字。湖廣各字。陝西誠字。四川其字。廣東及字。廣西席字。雲南若字。貴州柔

字。○康熙二年定日月食勘合。奉天府用光字。

○七年定月食。於太常寺衙門救護。中軍都督府順治十

五年○十四年定日月食歸欽天監職掌。前期

欽天監推算分秒時刻奏

聞。科鈔到部。仍用勘合。今例停止勘合。分行直省各官。均於

本衙門救護。至期由部遣司官一人前往觀象

臺。督同欽天監官測驗所食分秒。仍令欽天監

奏覆。凡遇日食。結綵於禮部儀門及大堂。設香

案於露臺上。鑿儀衛設金二鼓二十四於儀門

內兩旁。教坊司今改和聲署。設樂於露臺下。設各官

拜位於露臺上。皆嚮日。欽天監官報日初虧。鴻臚寺鳴贊。官贊排班。各官咸朝服序立。鳴贊。官贊進。贊跪叩興。樂作。各官行三跪九叩禮畢。樂止。禮部堂官上香畢。鳴贊。官贊跪。各官皆跪。教坊司今改和聲署官奉鼓及袍進。贊擊鼓救護。禮部堂官擊鼓三聲。衆鼓齊鳴。贊上香。樂作。贊起立。上香畢。各官起立。班首官上香。贊跪。各官仍跪。欽天監官報復圓。金鼓止。鳴贊。官贊跪叩興。各官復行三跪九叩禮。樂作。禮畢。樂止。各官皆退。月食集太常寺救護儀同。○六十年議准。閏六

月初一日日食。欽天監推得

京師

盛京朝鮮日食四分五分餘者救護。其日食二三  
分者皆不頒行。○六十一年奏准。本年十一月  
十五日月食。凡無執事之九卿詹事科道等官。  
咸素服前往太常寺。行三跪九叩禮。不作樂。仍  
擊金鼓救護。○雍正十三年奏准。本年九月初  
一日日食。各官素服赴禮部救護。與康熙六十  
一年護月同。○乾隆二年奏准。日月薄蝕。官員  
咸集祇跪救護。所以謹

天威嚴對越也。但自初虧以迄復圓。為時久暫不等。每見應集各官。多有因不能久跪。推託事故。不能咸集者。或有年老衰病。跪久委頓。不能支持者。又或徒倚踣踞。有礙觀瞻。事關典禮。豈容褻越。嗣後將吏戶兵刑工五部分為五班。及文武各衙門亦各分配班次。附於五部。每班令禮部堂官一人領班。祇跪。禮部都察院監禮等官。及鴻臚寺贊禮等官。亦輪流更換。初虧復圓行禮時。五班官員咸就班行禮。初虧行禮後。五班官員內。除年老不能久跪者退立外。餘均輪替。其更

替之人。暫退祇候。毋許譁笑語。其祇跪官員。務必整齊嚴肅。敬謹從事。儻有託故不到。及怠玩失儀者。監禮官即糾參。照例議處。○四年議准。救護月食。順治二年。定於中軍都督府。康熙七年。移於太常寺。所需兵役香供等項。仍係順天府經歷。用署中軍都督銜行文取用。殊未允當。嗣後應即停止。○七年。四月十五日。月食二分一秒。照康熙六十年之例。均不頒行。○又議准。救護日月食。止擊鼓鳴金。毋庸作樂。○十一年

論。月朔之期。朝臣例具補服。若值日食。仍具補服。殊非敬畏之意。嗣後月朔如遇日食。皆常服。永著為例。

十三年奏准。月食為月入地影。本體失光。故各省見食分秒皆同。日食為月體掩日。日距地遠。月距地近。人在地面。有東西南北之殊。故各省見食分秒各異。舊例月食三分以上。按各省見食時刻頒行。日食三分以上。按各省見食分秒時刻頒行。不及三分者。均不頒行。但日體光盛。人難仰窺。月體光清。人所共睹。或遇輕雲薄霧。日色亦有淡時。若食在三分以內。不豫行傳知。



恐觀者致生駭異。嗣後凡遇日月交食。無論一分以下及二分三分。皆由欽天監前期五月具題。由部通行各直省布政使。

盛京奉天府。轉行督撫提鎮將軍所屬各衙門。並朝鮮國一體欽遵。三分以上者救護。不及三分者不行救護。仍繪圖進呈。十四年

諭。凡日月交食。授時者原可推算而得。而春秋之例。又紀日而不紀月。朕惟懸象著明。人所共仰。雖為晷運之常有。自不若光朗之恆度。無事於諱。不可不謹。故崇社奏鼓。自古重之。舊制交食分秒時刻。頒行各省。

不及一分者不行救護。後定為三分以上方行救護。又經禮部奏定。不見食省分。並不及三分者。皆不行知。夫不先期行知。則二三分者原可見食。將致反生疑駭。不以為靈臺失占。即謂有司怠事。非所以克謹天戒也。嗣後仍循曩制。一分以上者。即令救護。前期五月具題請旨。無論見食不見食。省分皆頒行。其不見食。省分不必救護。二十三年。

諭。春秋書日食不書月食。古聖克儆。

天戒。惟是為兢兢。茲者季冬之朔。日食至八分之多。望日又值月食。一月之間。雙曜薄蝕。災莫大焉。我君臣

當動色相誠。側席修省。念邇年來西陲底定。殊域來歸。克奏膚功。皆仰賴

上蒼福佑。在朕宵旰殷懷。無刻不以持盈保泰為惕。並非出於矯強。亦中外臣民所共知。第人情當順適之時。檢持或尚未至。昔人所稱人苦不自知。良非虛語。夫

天心仁愛。人事宜修。儻用人行政之間。有所闕失。而不力為振飭。何以裨政治而召休和。在廷諸臣。共襄治理。寅恭夙夜。宜有同心。著傳諭大學士九卿科道等。各抒所見。據實敷陳。無有隱諱。○二十五年題准。四

月十六日庚寅望月食。

京師不見食。毋庸救護。是年五月

諭。序臨北至。一陰始生。薄蝕適逢。益切乾惕。古帝王克

做

天戒。不敢以宿離有常。度為解。朕亦同此志。彌月不雨。萬目增憂。幸即霑膏。麥稔可望。然盛滿為虞。非藉遇災知懼。始斤斤動色。詔做為也。前歲日食。下詔修省。而建言者。或毛舉細故。摭拾浮詞。雖不足深尤。究無裨實政。又清理刑獄。閒歲已敕部舉行。踵事不已。正昔人所稱。赦非善政者。應

天以實不以文。朕方側席省躬。所有本月朔內廷例用  
龍舟。上年既以禱雨不行。今雖際時和。並飭停罷。用  
申祇荷。

天仁示戒之至意。○三十七年奏准。嗣後遇有救護典  
禮。各部院滿漢堂官照常咸集外。如該衙門堂  
官俱有兼管行走之處。不克一體入班。仍須酌  
以堂官一員前赴行禮。以符體制。其該司官等  
並責令各該堂官確查。除有差使外。所有每司  
滿漢官員。不得僅以四五人或二三人充數。僅  
有概稱入直本署。及託別項事故者。嚴加叅處。

○四十年

諭。向遇上元節。例穿蟒袍三日。今年正月十六日。適屆月食。雖月食非日食可比。為春秋所不書。但究關垂象之義。亦應昭敬。是日著止穿常服。其蟒袍改於十七日補穿。所有應行筵燕。亦著改於十七日。○四十年

七年

諭。禮部具題本年八月十五日京師月食。百官朝服集太常寺行救護禮一本。雖係照例具題。但日月薄蝕。究非經行常度。向來朕遇此等事。皆於宮中素服拈香。行救護禮。百官齊集救護。亦應素服將事。以合奏

鼓之義。嗣後如遇日月食。當應穿朝服之期。亦著用素服行禮。著為令。○五十年

諭。明年元旦日食。著停止朝賀筵燕。所有救護典禮。著該衙門敬謹豫備。○又

諭。五十一年正月初一日食。業經頒諭停止朝賀。其救護典禮。禮部遵例奉行。朕仍於內殿恭設香案。虔誠祈禱。以答

上天垂象。做惕修省之意。至於下詔求言。史冊所稱。朕以為轉涉虛文。蓋事

天以實。為人君者敬

天勤民躬。理庶務。日慎一日。乃職分所當然。即大臣言官。應行陳奏事件。原當隨時入告。豈待日食然後求言。況今每日御便殿聽政。批答奏章。大學士軍機大臣及九卿科道等。不時召見。諮詢政務。而外省自督撫至道府。無不隨時宣召。未致民隱壅於上聞。詎因日食方始下詔求言耶。至薄蝕天變。日時度數有定。昔宋仁宗康定元年正月丙辰朔。應日食。先是日官楊維德等請移閏於庚辰年。則日食在前月之晦。帝曰。閏月以正天時。而授民事。其可曲避乎。不許。所見尤為合理。蓋凡日食必以合朔移於晦日。尤為非是。



又考漢唐以來。如光武建武二年。北魏孝文帝延興四年。太和十四年。唐太宗貞觀六年。均以正月朔日食。昔我

皇祖時。康熙三十一年。及五十八年。正月朔日食。且三十一年。有錫伯瓜爾察達呼爾等來歸。喀爾喀楚爾喀亦以屬裔來歸之事。可見日食為定數。而君人者則當因此益加戒懼。至於以改移為消弭之說。則尤斷斷不可。朕踐阼之始。即叩

天默佑。以若蒙

天祐。享國至六十年。即當傳位歸政。不敢如

皇祖之數逾花甲。今幸五十年。壽逾古稀。康彊如昔。惟  
有宵旰勤求。不遑暇逸。以仰副

上天眷顧之殷。

祖宗付託之重。若以天變欲為消弭。即於今歲歸政。則  
是欲移咎後人。圖卸己責。如宋高宗年未六十。傳位  
孝宗。置軍國大事於不問。不獨無以對

天。並無以對子。朕豈出此乎。從前推算天行度數。乾隆  
六十年乙卯。亦當元旦日食。與今歲同。若於是年歸  
政。則值嗣子首歲元正。尤屬非宜。朕心亦有不忍。何  
若以是歲為朕臨御六十年。頤和錫福之餘。即以次

年為嗣子迎

麻改元之始。國祥家慶。

天日重光。以副朕首祚之祈。以綿我大清億萬年之寶命。不其懿歟。○五十四年題准。四月十五日辛丑望

月食。

京師不見食。毋庸救護。朝鮮見食不及一分。亦無庸救護。○又題准。九月十六日己亥望。月食三分。

京師

盛京浙江福建江蘇山東安徽江西河南湖北廣

東湖。南山。西廣。西陝。西貴州。朝鮮等十七省。月  
在地平下。俱不見食。四川雲南見食不及一分。  
俱毋庸救護。惟甘肅見食一分以上。例應救護。  
○五十九年

諭。朕臨御天下五十九年。仰蒙

昊蒼眷佑。

列聖貽庥。薄海昇平。梯航嚮化。重熙累洽。惟日孜孜。無  
日不以敬

天勤民為念。行慶施惠。錫祜延禧。普免漕糧二次。地丁  
錢糧四次。而偶遇水旱偏禔。隨時蠲租。賜復賑貸。兼

施不下帑金數千萬兩。所以涵養生息。子愛黎元。至周且渥。茲紹膺統緒。明歲正屆六十年。粵稽史冊。前代皇帝享國長久者。未可多得。即有一二。或係沖齡踐阼。用能多歷年所。朕則春秋二十有五。始即位。誕膺大寶。迄今八旬。開四。康疆逢吉。五世同堂。景運增隆。寰瀛寧謐。享國之年。幸周甲子。壽祚延洪。實為今古罕覩之盛事。此皆上蒙

昊貺駢蕃。克膺備福。朕於感荷之餘。彌深兢業。早經欽天監推算六十年元旦日食。上元月食。古來史傳所載日食修德。月食修刑之說。固因

上天垂象。理宜修省。其實君人之道。於德刑二字。平日本宜刻深兢勵。亦何待日月薄蝕。始懷寅戒之心。應天以實。不以文。與其託諸空言。寧若見諸行事之實。修德莫大於愛民。若覃敷恩澤。加惠閭閻。俾海寓子民。共臻樂利。則所謂修德孰大於是。所有六十年各省應徵漕糧。著再加恩普免一次。其應如何分免之處。仍著該部覈議具奏。至以修刑而論。則停勾到。即以恤刑。但赦非善政。利於宵小。而不利於善良。昔人即有此論。明年係六十年國慶。後歲丙辰。為嗣皇帝即位元年。俱應行慶施仁。矜恤刑獄。若今停勾。則三

年連緩。著民恃有寬政。作姦犯科者。無所做畏。非辟以止辟之意。是以本年仍照舊勾到。明年元旦。照五十年之例。不御殿。不受朝賀。是日午後。向有諸王暨皇子皇孫等。內廷家燕之例。五十一年元旦日食。復圓後。曾經舉行。明歲究係六十年周甲年分。所有內廷家燕。亦著一併停止舉行。朕於是日亦不御禮服。照每年例。恭詣

奉先殿

堂子及

先師各等處行禮時。御龍袍貂褂。將屆日食時。即換

常服。以示寅恭而寓修省。日月薄蝕。躔度本原有定數。千萬年後。皆可推算而得。所謂千歲之日。至可坐而致。但元旦上元。適值日月虧食。究為

昊穹示儆之象。幸

天恩垂佑。適在明歲。為朕即位周甲告成之年。自應祇承無斁。設在丙辰正月。則為嗣皇帝即位之元。於吉祥盛事。轉為未慊。是即日月薄蝕一事。而

上天之篤佑朕躬。以貽我子孫萬年無疆之庥者。至優且厚。惟有益感

天恩。倍深乾惕。又明年乙卯。為朕臨御六十年。本欲於



萬壽節前。由熱河回京受賀。今春因中外臣工懇請舉行慶典。適以上冬雪澤未獲優霑。春閒又復缺雨。業經降旨宣諭。令將明年慶典停止舉行。若仍照庚戌年八旬之例。於萬壽前回京。則王公外藩以及大小臣工等。必有再四懇請舉行慶典。則似朕今春所降諭旨。反為不誠。是以明年仍定於熱河駐蹕。過萬壽再行回鑾。俟至丙辰正月歸政嗣皇帝。以符正月。上日受終文祖之義。彼時備儀授受。盛典光昭。嗣皇帝率領臣民。以天下養。介禧祝嘏。慶洽敷天。尤為千古罕覩盛事。實我大清億萬載無疆之福也。將此通

諭知之。又

諭前因六十年乙卯元旦日食。上元月食。雖薄蝕躔度。可以豫行推測。所謂千歲日至。可坐而致。但稽古史傳所載。遇有日食月食等事。往往下詔求言。以示修省。朕思

上天垂象。固宜戒慎。而應

天以實不以文。與其託諸空言。孰若施諸實政。前已降旨。普免天下應徵漕糧。俾海宇子民。共臻樂利。今思各省尚有節年民欠。及因災帶緩未完銀穀。俱應按限徵輸者。小民究因官欠未清。未得遂其含哺之樂。

朕仰邀

昊眷。在位六十年。寰宇寧謐。景運增隆。丙辰年即屆歸政。今若於朕臨御之年。覃敷恩賚。俾小民積年欠項。廓然一清。得以戶慶盈寧。共游化宇。所謂修德愛民。孰大於是。而修刑亦概於是矣。以此上應

垂象。感召麻和。實屬吉祥盛事。所有各省節年正耗民欠。及因災緩徵帶徵銀穀。著各督撫詳晰查明。按照各省所屬之某州某縣實欠在民銀穀若干。速行開單具奏。到日降旨豁免。並著先將此旨騰黃宣示鄉邨鎮市。咸使周知。○嘉慶五年

諭。四月初一日為孟夏時饗。

太廟之期。是日正值日食。所有陪祀王公大臣官員俱穿朝服。於禮畢後。其應救護之大臣官員。換戴雨纓帽。穿青褂。赴禮部救護。其不陪祀不救護進內當差王公大臣官員。俱戴緯帽。穿青褂一日。○七年

諭。本年八月朔日。食九分有奇。望日又值月食。朕仰維上天示儆。戰兢惕厲。時深悚懼。愧無以格。

是祐而弭眚災。因命軍機大臣。恭查乾隆年間日食。

皇考節次所降德音。內載乾隆二十三年十二月朔日

食八分。望日亦值月食。恭奉

諭旨。省過求言。仰見

皇考持盈保泰之盛心。今一月之間。雙曜薄蝕。而日食至九分有奇。視八分殆又過之。朕觀象省躬。惟恐用人行政。或有闕失。朝夕寅畏。莫敢或違。而四海之大小。萬民之衆。或智慮未周。德意未孚。心甚歉焉。凡內外大小臣工。佐襄邳理。各宜勤思職業。恐懼修省。尤當齋心研慮。於朝廷政治。安內寧外之大者。剴切敷陳。謙言無隱。即如勦捕川楚邪匪一事。七載於茲。現在軍營連次克捷。雖已將著名首逆。殄除殆盡。而三省敗殘餘孽。尚在逋誅。或應靖以兵威。或應迪以德化。

諸臣苟有真知灼見。不妨據事直陳。此外政事措施。或有不便於民。及一時行之日久滋弊者。均當指陳利害。匡朕不逮。但不得毛舉細故。摭拾浮言。如條陳更改部院則例等事。試思現行則例。皆經前人咨謀審定。可垂久遠。若其中有應時變通者。我

列祖

列宗。早經斟定盡善。朕監於

成憲。不敢輕議更張。而在廷諸臣。才識又豈能邁越前人。輒思更改舊制乎。况近日臣工條奏改例事。交議後。往往有格礙難通。仍行駁斥者。徒勞奏牘於政事。

何補。若能於國計民生實有裨益。俾朕因言求治。可見施行。乃修德之大者。至月食修刑。見於載籍。但人命至重。總當慎憲於平時。原不待月食始懷矜恤。况以肆赦為修刑。本非善政。昔人亦曾言之。我

皇考明降

諭旨。申諭甚詳。誠以刑以輔德。道貴協中。若狃於救生不救死之俗論。將行兇釀命之犯。有心輕縱。不顧死者銜冤。是欲博寬大之名。而轉失平允之道。所謂修刑者安在。夫修刑之實。惟當於定讞時細心研究。無枉無縱。使死者生者。兩無遺憾。方有合於詳慎庶獄。

之意。即停免勾決。間一舉行。閱歲仍當予勾。並非施恩以貸姦宄。總之為人君者。克儆

天戒。修德修刑。惟在本身徵民。規乎遠大。所謂應

天以實不以文。朕與在廷諸臣。所當交修共勉。自大學士九卿科道。及應行奏事者。其詳繹諭旨。各抒所見。即時陳奏。朕將採納焉。○十七年

諭。乾隆六十年正月十五日望月蝕之日。例設筵燕。仰蒙

皇考高宗純皇帝。特命移改燕期。以示謹懍

天戒之意。明歲正月十五望。亦值月蝕。所有年例節次



應設筵燕。自當恪遵。

成憲酌改日期。用昭寅畏。上元前一日家燕。阿哥王貝勒著照舊舉行。十五日仍照例穿蟒袍補服。屆申時即更換常服。其正大光明殿筵燕外藩及王公大臣著移於十六日辰時。皇后內廷家燕著移於十六日未時。小燕廷臣著移於十七日未時。十七日預燕之王大臣著穿蟒袍補服。餘俱常服。二十年五月

諭本月十六日恭值

方澤大祀行禮之時。已在月食復圓之後。陪祀救護均關典禮。不可闕略。其救護官員不及詣

壇陪祀。著各該衙門將應行陪祀救護之員。酌量分派。俾各敬謹將事。並著稽查科道。分別嚴查。儻有藉詞推諉。兩處不到者。指名叅奏。○道光九年定。日月食。由禮部行文廣西巡撫。移咨越南國。○又定。日月食除有事故堂司官員外。其餘俱行救護。禮文官及漢缺武職各官。日食於禮部救護。月食於太常寺救護。八旗滿洲蒙古漢軍都統副都統以下官屬。遇日月食。均救護於各旗公署。○咸豐二年

諭。通政使羅惇衍奏。一月之中。日月並食。請嚴飭廷臣。

實力修省。以回天變。並請停止冬至慶賀等語。日月薄蝕。躔度固有定數。然自古帝王。皆因此而深戒懼。我朝

列聖。每因災異。特降

諭旨。戒飭羣臣。共圖修省。蓋以

上蒼垂象。必當君臣交儆。克謹

天戒。並非博側身修行之名。載之史冊也。現在盜賊未平。河決未堵。國用未足。民困未蘇。總由朕用人行政。多有缺失。謫見於

天。敢不自省。所有本年冬至升殿受賀典禮。著即停止。

至內外大小臣工。各有職守。近來因循推諉。積習頗深。疊經降旨申誡。其感奮有為者。固不乏人。而陽奉陰違。甚至揣摩迎合者。亦復不少。是以朕於秋仲經筵。以有言逆於汝心。必求諸道。有言遜於汝志。必求諸非道命題。特宣御論。昭示臣工。朕兢業寸衷。幾康自敕。原不求中外共喻。而諸臣事上之心。為實為名。亦難逃朕鑒。嗣後惟期共矢公忠。力除積習。洗心滌慮。以佐朕躬。斯即應

天以實不以文之意也。將此通諭知之。○同治五年

諭。御史汪朝棨奏月食示儆。請飭在廷諸臣實力修省。

一摺。現在捻匪回氛。尚未平定。江南之淮揚廬鳳湖  
北之江漢蘄黃等處。均罹水災。允宜倍深儆惕。朝廷  
宵旰勤求。不敢稍自暇逸。內外臣工。其各力圖振作。  
同心協贊。用副恐懼修省之意。○光緒九年奏准。本  
年十月初一日日食。卯辰之間。係例定。

### 太廟時饗

午門

頒朔均應朝服作樂。行禮之時。未便與素服救護同  
時舉行。應將行禮時刻。酌展向前。

太廟時饗。於寅初朝服行禮。

午門

頒朔於寅正朝服行禮均照常作樂總期於卯初日食初虧以前禮成以昭敬慎而重典禮。十六年十月十五日辛亥望。

京師月食十八秒見食不及一分毋庸救護。

行在日月食救護。凡恭遇

巡幸熱河如遇日食月食於

關帝廟行救護禮所有扈從王大臣官員俱一體救護。乾隆十六年

諭。日食天變之大者自古重之。願僅以引咎求言虛文

從事。夫豈應

天以實之義。乃者五月丁酉朔。日有食之。朕自惟宵旰  
憂勤。無時不深乾惕。寧待懸象著明。始知戒儆。然遇  
災而懼。罔敢不欽戒慎修省。惟崇實政。行在鑿儀。衛  
早晚鼓角。是日著停止一日。以示徹懸齋戒。我君臣  
當就常存之敬畏。倍加謹懍。益修實政。嘉慶七年  
八月初一日己亥朔。日食。十六日甲寅望。月食。

恭逢

仁宗睿皇帝駐蹕熱河。軍機大臣面奉

諭旨。所有扈從王大臣官員。俱令一體救護。嗣經

行在禮部奏定救護儀節均於熱河

關帝廟行救護禮

儀節謹奉  
載於後

旨嗣後行在如遇日食月食著照此次辦理一體救護

○又奏定

行在遇日食救護之儀是日地方官飭役赴廟潔掃  
設香案於露臺上隨日為嚮布王公百官拜席  
於香案後鑾儀衛率官校陳金鼓於廟門內龍  
旗

御仗各二引仗各六金二鼓二十有四畫角十有  
二列甬道東西百官素服詣廟祇候王公宗人



府為一班。蒙古王公為二班。內閣吏部翰林院  
通政司為三班。戶部太常寺鴻臚寺欽天監為  
四班。兵部理藩院鑾儀衛上駟院武備院步軍  
統領及漢缺武職為五班。刑部工部大理寺光  
祿寺太醫院為六班。散秩大臣護軍統領八旗  
內務府為七班。每班以禮部堂官內閣學士太  
常寺堂官分領之。鴻臚寺官及禮部官。分列於  
香案左右。欽天監博士一員候時。樂舞生二名  
奉小鼓。俟於露臺下。欽天監報日初虧。鴻臚寺  
官贊齊班。禮部官引王公百官至拜位前序立。

贊跪叩興。衆行三跪九叩禮。興。贊上香。禮部堂官進至香案前。三上香畢。復位。贊跪。皆跪。贊伐鼓。樂舞生奉小鼓跪於左。禮部堂官伐鼓三聲。廟門內金鼓振作。乃按班更番上香。祇跪。禮部官鴻臚寺官更番祇立。欽天監官報日復圓。鼓聲止。鴻臚寺官贊齊班。王公百官合班聽贊。行三跪九叩禮如初。畢。各退。月食救護。與日食同。惟未傳蒙古王公行禮。止分六班救護。○二十四年。三月十六日月食。恭逢

仁宗睿皇帝駐蹕盤山行宮。照嘉慶七年之例。令扈從

王大臣官員一體救護。由直隸總督選擇潔淨廟宇。豫備行禮。一應事宜。各該處照例備辦。○  
道光九年九月初一日日食。恭逢

宣宗成皇帝駕詣

盛京。駐蹕沙河。所有屆期救護之王公大臣。由行在禮部請

旨酌派數員前往。司員由各該堂官酌派。在該處關帝廟救護。○十七年三月十七日月食。

宣宗成皇帝由髻髻山回鑾。駐蹕三家店。援照九年成案。請

旨酌派於該處三義廟救護。

欽定大清會典事例卷五百一

禮部

方伎

陰陽學 醫學  
正一真人 事例

僧道

喇嘛 其例

陰陽學。康熙十三年議准。在外陰陽學等官。由該撫將應補之人咨部。詳查註冊。停其具題。填給劄付。移咨該撫行令任事。○雍正七年覆准。各省星學等責令陰陽學管轄。由地方官遴選素行端方者。咨部照例給劄。

醫學。○原定。由直省地方官遴選請於醫理者。咨部給劄。與陰陽學同。○乾隆二十九年題准。

吉林所屬伯都訥地方。添設監獄。設立無俸從九品醫官一員。三十年題准。吉林所屬甯古塔地方。添設監獄。設立無俸從九品醫官一員。○嘉慶十七年題准。三姓阿爾楚喀地方。設有監獄。各設無俸從九品醫官一員。由部照例給予劄付。令其任事。○同治五年覆准。嗣後醫官扣滿六年。由太醫院會同禮部。將吏目醫士恩糧等員考試一次。分別去留。

僧道。○天聰六年定。各廟僧道。設僧錄司道錄司總之。凡通曉經義。恪守清規者。給予度牒。○

又定僧道不許買人為徒。違者治罪。○崇德五年題准。新收僧人納銀。送戶部覈收。隨給用印度牒。令僧綱司分發。○又定滿洲蒙古漢軍。有為巫師道士。跳神驅鬼逐邪。以惑民心者。處死。其延請之家。一併治罪。○順治二年定。內外僧道。均給度牒。以防姦偽。其納銀之例停止。凡寺廟庵觀若干處。僧道若干名。各令住持詳詢籍貫。具結投僧道官。僧道官加具總結。在京城內外者。均令呈部。在直省者。赴所在地方官呈送。彙申撫按解部。頒給度牒。不許冒充混領。事發

罪坐經管官。○又定。內外僧道有不守清規。及  
犯罪人為僧道者。令住持舉首。隱匿不舉。一併  
治罪。頂名冒領度牒者。嚴究治罪。○又定。內外  
寺廟庵觀。凡有前明舊敕。盡令繳部。不許隱藏。  
又嚴禁京城內外。不許擅造寺廟佛像。必報部  
方許建造。其現在寺廟佛像。亦不許私毀。僧道  
住處。不許私遷移出佛像。及自置緣簿募化。不  
許私削髮為僧。僧道官住持縱隱。一併治罪。○  
三年定。在京寺廟庵觀。不許僧尼道士混處。及  
閒雜人居住。工部五城查明僧道官有容隱者。



一例重懲。○又定嚴禁京城僧道沿街設置神像。念誦經呪。或持擊梆磬募化者。該管僧道官即行重治。如住持募化罪及闔寺。如散衆募化罪坐住持。及該管僧道官一併治罪。○六年題准。內外僧道。必有度牒。方准住持焚修。該部刊刻度牒。印發各布政使及順天府。查境內僧道素無過犯者。每名納銀四兩。給予度牒一紙。各州縣於歲底申解該司彙解戶部。仍報部考覈。從前給過度牒。一併追繳。○八年奉

旨。僧道均免納銀。如有請給度牒者。該州縣察覈呈報

司府。呈禮部照數給發。○又定。

皇城内不許作道場。○九年

諭僧尼道士已領度牒者務恪守清規用本等衣帽住居本寺廟如未領度牒私自為僧尼道士及用番僧衣服往來者照例治罪。○十一年定禁止創建寺廟其修理頽壞寺廟聽從其便但不得改建廣大。○十五年題准直省僧尼道士已經給過漢字度牒者盡令繳出送部照數換給清漢字度牒並確覈先年已納銀者換給新牒未納銀者納銀給牒。○十七年議准僧道度牒免其納銀令

各該撫詳開年貌籍貫。及焚修寺廟。備造清冊。並送紙張投部。印給度牒。康熙元年定。凡作道場者。止許在本家院內。其當街建設席棚。揚幡懸榜。及僧道張繖奉持香帛。繞街行走。取水畫地開鄴。都穿戴甲冑等項。悉行禁止。違者僧道杖二十為民。該管僧道官革職。其作道場之家。係官交該部議處。係民治以違禁之罪。又定旗人凡有邪病。請巫師道士醫治者。須領巫師道士稟知各都統副都統。用印文報部。方許醫治。違者將巫師道士交刑部正法。其請醫治

之人。交部議罪。○四年題准。

興京

盛京及

京師寺廟僧道均遵

旨建設外。其前代敕建寺廟。各設僧道十名。私建大寺廟各設八名。次等寺廟各設六名。小寺廟各設四名。最小寺廟各設二名。○又題准。本戶不及三丁。及十六歲以上。不許出家。違例者治罪。僧道官及住持知而不舉者。一併治罪。罷職還俗。○六年。通計直省敕建大寺廟共六千七十有

三。小寺廟共六千四百有九。私建大寺廟共八千四百五十有八。小寺廟共五萬八千六百八十有二。僧十有一萬二百九十二名。道二萬一千二百八十六名。尼八千六百十有五名。共計寺廟七萬九千六百二十有二。僧尼道士十有四萬一百九十三名。○十二年議准。無為白蓮焚香聞香混元龍元洪陽圓通大乘等邪教。惑衆聚會念經。執旗鳴金聚衆拈香者。通行八旗直省嚴行禁飭。違者照例懲責。○十三年定僧錄司善世闡教講經覺義。左右各二人。左善世

由右善世補。右善世由左闡教補。左闡教由右  
闡教補。右闡教由左講經補。左講經由右講經  
補。右講經由左覺義補。左覺義由右覺義補。右  
覺義以候補僧官補。道錄司正一。演法至靈。至  
義。左右各二人。左正一由右正一補。右正一由  
左演法補。左演法由右演法補。右演法由左至  
靈補。左至靈由右至靈補。右至靈由左至義補。  
左至義由右至義補。右至義以候補道官補。如  
無候補之人。行僧錄道錄司。選取在京僧道送  
部。出題考試。取經典諳熟。並為人端潔者十名。

或取二十名。咨送吏部存案。按名遞補。皆不支

俸。

今例由管理內務府大臣選補。送部給劄。詳見內務府事例。

○又議准。在

外僧道。府屬曰僧綱司道紀司。州屬曰僧正司。

道正司。縣屬曰僧會司道會司。均由各該撫將

應補僧綱道紀之人咨部詳察。轉咨吏部補授。

准其註冊。停止具題。仍知會到部。填給劄付。移

咨該撫行令任事。

今例由部給劄補授。年終彙報吏部。

○又定。內

外僧道官。專管天下僧道。恪守戒律清規。違者

聽其究治。若所犯與軍民相涉者。在京申部酌

審。在外聽有司斷理。○又定。京城內外寺院庵

廟宮觀祠宇。不許容留無度牒僧道。及間雜人等居住歇宿。○十五年題准。凡僧尼道士。不領度牒。私自出家者。杖八十。為民。有將逃亡事故。度牒頂名冒替者。笞四十。度牒入官。該管僧道官皆革職還俗。○又題准。直省僧道。停止給予度牒。○十六年定。京城內寺廟庵院。不許設教聚會。男女混雜。並不許建設高臺。演劇斂錢。酬神賽會。僧道錄司。及該管僧道官。不時稽察。有違禁者。執送到部。將本人及寺廟住持。一併治罪。該管僧道官。不行稽察。由部處分。○二十二



年議准。

盛京僧道仍給予度牒。○二十三年議准。福建臺  
灣僧道舊牒追繳送部。換給新度牒。○二十六  
年覆准。無賴狂徒。假借僧道為名。或稱祖師降  
乩。或妄逞邪說。託言前知。或以虛妄之談。鼓動  
愚蒙。至有羣相禮拜。甘作徒從者。嗣後此等邪  
教。通行八旗五城各省督撫地方官。令其嚴行  
禁止。○四十八年覆准。鳴金擊鼓聚眾燒香男  
女混雜等弊。曾經嚴禁。恐相沿日久。舊俗復熾。  
再扶鸞書符招搖賣緣之輩。皆應永行禁止。嗣

後如有仍前擅行者。該地方官即行究治。如不實心查究。在京或經該部查出。外省或經督撫查出。將該管官指名題參。○五十年

諭。直省創建寺廟。多占據百姓田廬。既成之後。愚民又為僧道日用。糾集銀錢。購買田地。給予。以致民田漸少。且游民充為僧道。藏匿逃亡罪犯。行事不法。實擾亂地方。向原行禁止。因日久漸弛。著各督撫暨地方官。除原有寺廟外。其創建增造。永行禁止。○又覆准直隸各省。嚴飭地方官。概不許創造寺廟。該僧道官不時稽察。取具甘結呈報。並不得容留外

來可疑之人。如有故違。致生事端者。依律治罪。  
○雍正元年覆准。江南浙江等省。禁止婦女游  
山入寺。○二年覆准。愚昧之徒。縱令婦女成羣  
聚會。往寺廟進香。有壞風俗。嗣後將寺廟進香  
起會之處。嚴行禁止。犯者照例治罪。其住持及  
守門人。不禁者同罪。○又覆准。五城寺廟。禁軍  
民妻女入廟燒香。及扮神賽會。其民間春秋義  
社祈報者。不在此例。著都察院。分析出示。並令  
司坊官。明白曉諭。○七年覆准。游方僧道等。責  
令僧道官管轄。地方官遴選恪守清規者。咨部

照例給劄。十三年十一月

諭。四民之中。惟農夫作苦。自食其力。最為無愧。庀化八材。以利民用。非百工莫備。士則學大人之學。故祿其賢者能者。至於商賈。阜通貨賄。亦未嘗無益於人。而古昔聖王尚慮逐末者多。令不得衣絲乘車。推擇為吏。以重抑之。今僧之中有號為應付者。各分房頭。世守田宅。飲酒食肉。並無顧忌。甚者且畜妻子。道士之火居者亦然。夫一夫不耕。或受之飢。一女不織。或受之寒。多一僧道。則少一農民。乃若輩不惟不耕而食。且食必精良。不惟不織而衣。且衣必細美。室廬器皿。

玩好百物。爭取華靡。計上農夫三人。肉袒深耕。尚不足以給僧道一人。不亦悖乎。朕於二氏之學。皆洞悉其源流。今降此旨。並非博不尚佛老之名也。蓋見今之學佛人。豈獨如佛祖者無有。即如近代高僧。實能外形骸清靜超悟者亦稀。今之道士。豈獨如老莊者無有。即如前世山澤之癯。實能凝神氣。養恬壽命者亦稀。然苟能遵守戒律。焚修於山林寂寞之區。布衣麤食。獨善其身。猶於民無害也。今則不事作業。甘食美衣。十百為羣。農工商賈。終身竭蹶以奉之。而蕩檢踰閑。於其師之說亦毫不能守。是不獨在國家為游

民即繩以佛老之教。亦為敗類。而可聽其耗民財。混民俗乎。著直省督撫飭各州縣按籍稽查。除名山古剎。收接十方叢林。及雖在都市。而願受度牒。遵守戒律。閉戶清修者。不問外。其餘房頭。應付僧。火居道士。皆集眾面問。願還俗者聽之。願守寺院者亦聽之。但身領度牒。不得招受生徒。所有資產。如何量給還俗。及守寺院者為衣食計。其餘歸公。留為地方養濟窮民之用。並道士亦給度牒之法。該部詳悉妥議具奏。

○乾隆元年

諭朕前以應付僧火居道士竊二氏之名。而無修持之

實甚且作姦犯科難於稽察約束是以酌復度牒之法使有志修行者永守清規而無賴之徒不得竄入其中以為佛老之玷其情願還俗者量給資產其餘歸公留為養濟窮民之用此亦專為應付僧火居道士而言也名山古剎閉戶清修者在所不問前降諭旨甚明現交與王大臣九卿會議乃聞外省傳述錯誤一切僧道皆有惶惑不安之意恐將資產歸公遂爾弊端百出有將己身田宅詭寄他人戶下希圖藏匿者有謀囑書吏分立花戶詭名以多報少者有減價速求售賣變銀入橐者且有局外匪類從中藉口

索詐者。夫此僧道既謀利戀財如是。揆之仙佛之法。乃糠粃稂莠也。即取其私橐歸公。以養濟窮民。亦何不可之有。天下後世自有公論。但朕之本意。原以天地好生之心為心。一物不得其所。如已推而納之溝中。此庸愚無知之僧道。亦天下之一物耳。朕何忍視同膜外。况朕先所降旨甚明。原以護持僧道。而非有意苛削僧道。今觀伊等情形。是愚昧無知。被人恐嚇。而不知原降之諭旨也。著該部先行曉諭。去其迷惑。至於應付僧火居道士之資產。因無所歸着。是以有養濟窮民之說。究竟國家養濟窮民。豈需此區區之



財物。亦可不。必稽察歸公。此處著重議具奏。又聞外  
間有尼僧一種。其中年老無依情願削髮者。尚無他  
故。其餘年少出家之人。心志未定。而強令寂守空門。  
往往蕩閑踰檢。為人心風俗之害。且聞江浙地方。竟  
有未削髮而號稱比丘者。尤可詫異。似亦應照僧道  
之例。不許招受生徒。免致牽引日衆。有情願為尼者。  
必待年齒四十以上。其餘概行禁止。著將此一併入  
於會議中妥議具奏。欽此。遵

旨議定。嗣後僧錄等令地方官於戒僧內選擇樸實謹  
慎之人。報部充錄。道錄等於道士內無家室實

在住廟者。詳慎選擇充補。其現在受戒僧人。全真道士。素守清規。具有保結者。均應頒給度牒。若經僧道等官之手。易滋需索擾累。應行令順天府奉天府直省督撫轉飭該地方官。將各僧道年貌籍貫並焚修所在繕造清冊。取具互結。加具印結。申送該督撫彙齊報部。照冊給發度牒。仍飭各地方官當堂給各僧道收執。遇有事。故將原領度牒追繳。如有改名更替。或藉名影射。及私行出家者。皆照違

制律治罪。至於應付僧人。令該地方官傳集面詢。果

係實心出家情願受戒者。給予度牒。不願受戒者。即令還俗。編入里甲為民。若老邁殘疾。既難受戒。又難還俗者。查實亦給予度牒。許其看守寺廟。以終天年。又如深山僻壤寺廟。僧人不能遠出受戒。及俗家並無所歸者。亦姑給予度牒。仍別註冊。永不許招受生徒。至在京各省道士。果無家室實心住廟焚修者。給予部照。毋庸給牒。大居道士。則勒令還俗。如有年老別無營運者。亦暫給予部照。永不許招受生徒。其尼僧一項。亦照僧道之例。願還俗者聽其還俗。無歸者

亦暫給予度牒。不得招受少年女徒。嗣後婦女有年未四十出家者。該地方官嚴行禁止。至各寺廟所有資產。免其稽查。以省紛擾。頒發牒照所需紙板工價等項。均於戶工二部支取。歲終奏銷。○又覆准。年少沙彌道童。察其果無父兄可依者。暫留寺觀。造冊備案。年至二十不願受戒。及二十以內力能謀生。願還俗者聽。至年少女尼。不準暫留庵廟。惟四體偏廢。五官闕陷。及實無所歸者。照原題內僧道殘疾之例。暫行給牒。以贍餘生。○又覆准。八旗人等不得入天主

教令各該旗都統等通行曉諭禁止。違者從重

治罪。

此條現  
已他條

○二年

諭。給予僧道度牒一事。朕前後兩頒諭旨。明切曉示。冀督撫有司辦理妥協。昨問及安徽巡撫趙國麟。據伊奏稱。有此番澄汰。嗣後便可不必再給度牒等語。朕不知趙國麟之意。將以度牒為多事滋擾。而不必給耶。抑謂釋道之教。應行禁絕。而嗣後毋庸給發。遂永不許人為僧道耶。恐直省督撫未必能如是精明。強固。不動聲色。遂使天下無一僧道也。夫朕之酌復度牒。本以僧道徒眾太繁。賢愚混雜。其中多童稚孤

貧。父母親戚主張出家。而非其所願者。亦有託迹緇黃。利其財產。仍然蕩檢踰閑者。甚至匪類作姦犯科。不得已而薙髮道妝。以避通詰。藏垢納汙。無所不至。是以給發度牒。今有所稽考。亦如民間之有保甲。不至藏姦。貢監之有執照。不容假冒。果能奉行盡善。則教律整飭。而閭閻亦覺肅清。豈欲繁為法禁。苦累方外之民耶。夫釋道原為異端。然誦讀經書。而罔顧行檢者。其得罪聖賢。視異端尤甚焉。且如星相雜流。及回回天主等教。國家功令原未嘗概行禁絕。彼為僧為道。亦不過營生之一術耳。窮老孤獨。多賴以存活。

其勸善戒惡。化導愚頑。亦不無小補。帝王法天立道。博愛無私。將使天下含生之類。無一不得其所。僧道果能閉戶焚修。亦如隱逸之士。避迹山林。於世教非有大害。豈必盡驅還俗。使失業無依。或致顛連以終世哉。至於少年為尼。恐心志未定。別生事端。故待年已老成。始許披剃。亦非盡絕其教也。若云僧道多一人。則盡力南畝者少一人。恐目今為僧道者。未必皆肯盡力南畝者也。朕今直省督撫。年終彙題。即欲徐徐辦理之意。亦並非為目下盡行禁絕人之為僧道也。趙國麟此奏。誤會朕意。他省督撫。恐尚有似此者。

故再行申諭。務體朕撫育羣生物各得其所之意。詳細妥議。徐徐辦理。又前年以民間喜建寺廟。而舊時寺廟傾圮者多。特諭止許修葺舊寺廟。近聞舊址重修者絕少。間有新建寺廟者。地方官並不將朕諭旨宣布開導。此亦奉行不謹。怠忽從事之一端。並諭令直省督撫知之。○三年議准。直省僧尼道士。頒發牒照。宜豫籌清釐之法。俾有成數可稽。現在應付火居人等。止給本身牒照。不准招受生徒。庶牒照止有繳銷而無續增。其合例應招生徒之僧道。亦必年逾四十。始許招徒一人。所招之人。即



於其師原領牒照。由地方官註明所招者之年貌籍貫。簪剃年月。用印鈐蓋。取具五人互結存案。師故即為本人之牒照。次第相傳。不必別給。該州縣歲終彙報該撫。該撫隨五年審丁之期。別具清冊報部。如所招之人身有過犯。應還俗問罪者。即於其師牒照內除名。亦不註其師續招。若招徒無過病故者。准其報明地方官再行招受。即於牒照內註明。以防影射。因水火盜賊而遺失牒照。亦許呈明。咨部再給。若其師受徒之後犯罪。應追繳牒照者。將牒照即行繳銷。所

招生徒願還俗者聽。願出家者。別聽投師註名牒照。至已故之牒照。不得暗行隱匿。現在之牒照。不得私相授受。均責成僧道官實力稽查。地方官不時察覈。如有隱匿影射情弊。將僧尼道士勒令還俗。治以頂替假冒之罪。僧道官容隱者。斥革還俗。仍照違令律笞責。地方官不行察覈者。照失察例。罰俸三月。僧道等年未四十而招受生徒。或招受不止一人者。照違令律笞責。僧道官容隱罪同。地方官失察奪俸。○四年覆。僧道情願投師者。該師將所招之人。報地方

官。查明年貌籍貫。並取具鄰族地保。並無過犯。甘結存案。至遠來投師之人。應令所居住持。呈地方官。咨取原籍地方印甘。各結到日。方准發。利。又奏准。自乾隆元年起。至四年止。共頒發。過順天奉天直隸各省度牒部照三十四萬一。百十有二紙。遵照原議。令其師徒次第相傳。不。必再行給發。各督撫仍於五年審丁之期。別具。清冊報部。又覆准。應付僧火居道士。內有老。邁殘疾。及深山僻壤。俗家無可歸者。姑給印照。仍令該地方官查明此項牒照。即大書不許招。

受生徒字樣。鈐蓋印信。其年終彙繳之牒照。令該管僧道官當堂面繳。即將銷字印記牒照。並截去一角。繳送督撫報部覈銷。又議准。嗣後民間獨子。概不許度為僧道。嚴飭地方有司。明張曉示。仍責令僧道官時加查察。儻有故犯。本家家長及受徒之僧道。均照違

制律問擬。僧道勒令還俗。僧道官不行查出。一併斥革。其現在僧道內。如有獨子出家。宗祧絕繼者。除老邁殘疾不能還俗之獨子外。其例應還俗者。該地方官出示曉諭。聽其自首還俗。將牒照

繳銷。違者照例治罪。○五年

諭僧道亦窮民之一。朕不忍概從沙汰。故復行頒給度牒。使有所覈察。今禮部頒發牒照已三十餘萬張。而各省繳到者尚少。是或仍事因循。僅奉行故事。則甚非朕所以禁游惰勤力作之本意矣。著該督撫留意善為經理。並著於歲終將所減實數具奏。○七年覆准。直省僧道由部於歲終將僧道所減實數奏聞。業經令各該督撫繕黃冊進呈。別造清冊送部察覈。逐年冊籍井然可稽。所有隨五年審丁之期造冊報部之例。即行停止。○八年覆准。直省有

未曾領牒照之僧道。游手託名。查明曾經過犯。即勒令還俗。編管為民。若素無過犯。實心出家者。准令投師傳牒。別款附冊。年終奏報。至於外來投歇。驗無牒照者。許令住持報地保鄰甲。呈官驅逐回籍。若違例私自容留。犯案事發。將住持僧道分別治罪。地方官徇隱者議處。九年議准。河南三教堂。中設佛老聖人三像。附近男女時往拜禱。武陟一縣。至有三十八處。淇縣安陽高邱等次之。總計豫省凡為三教堂者約五百九十餘處。而商城石洞尤為宏壯。其像雜用。

銅鐵土木石。皆藻繪金飾。其坐次。佛踞中。老子  
聖人互相左右。而略小其身。俯仰旁側。其奉祀  
緇流羽士。而甯陵信陽等州縣。住持女僧。尤屬  
穢媿。即敕該撫嚴行禁止。其聖像實不便毀銷。  
如欲移奉。令該撫查明通省書院若干。義學若  
干。並各屬或有潔淨公所。漸次奉迎安設。其祠  
宇改稱寺觀。三教額碑悉行撤去。若向屬公地  
管領無人。現在住持僧道本無產業可依者。酌  
令遷於別寺觀居住。其佛老諸像。亦即聽其移  
奉。將其地改為書院義學。安奉聖像。仍將辨過

之處。報明禮部存案。並將嗣後再有倡議修建三教堂者。飭地方官嚴行究治。如有容隱。一併叅處。再豫省界連燕趙秦晉。北五省風氣相類。三教堂亦所在多有。惟南方罕有聞者。然道流建醮。輒以天尊之號。謬加聖人。誑惑愚俗。誣罔不經。亦一體嚴行飭禁。○十二年覆准。造送僧道四柱清冊。照依編審人丁之例。其清冊仍照前式造報。另取各州縣僧道尼姑花名年歲清冊。將投師傳徒之處。逐一註明。隨案同送。○十八年覆准。聚衆為匪之案。多由姦邪僧道主謀。



平時煽惑愚民。日漸釀成大案。令該地方文武各官。查照元年四年議准僧道牒照確取保結。詳咨授受頂給之定例。實力奉行。如遇公事之便。就近親至庵廟寺觀。細加體訪。務使姦究之徒。不能涸迹僧道。以消患於未萌。如文武官仍視為具文。以致藏姦匿匪。煽惑愚民。釀成逆案。一經發覺。將該管地方官及該管上司。並武職各官。皆照不能察緝姦民例。分別議處。再僧綱道紀等司。乃專管僧道之人。如該管內有為匪不法之徒。即應隨時稽察舉首。如坐視不問。贖

徇隱匿。別經發覺者。將僧綱道紀等司嚴提究  
審。如果明知縱容犯係逆案者。即照知情故縱  
逆犯本律。分別已行未行按律定擬。若止失於  
稽察。並無徇縱情弊。亦當咎其平日不能約束。  
坐以不應重律。杖八十。○十九年

諭。前經降旨禮部頒發僧道牒照。復令各督撫歲終將  
所減實數具奏。此原欲毆游手為良農。略示沙汰之  
意耳。乃十餘年來。各省奏報不過具文從事。且若輩  
即盡令歸農。安得餘田而與之。轉不免無藉為匪耳。  
據實嚴查。或致滋擾。有名無實。此綜理日久所悉。正

不必襲復古闕異之迹也。著停止。○二十四年奏准。直省各府及直隸州屬僧道官及陰陽官醫官。鑄給印記之處。一概停止。已給者飭令繳銷。嗣後僧道醫學等官。如有事故更換之處。仍隨時咨部給發割付。○三十年定。凡有補放僧道等官。禮部既經查明。即行給發割付。於每年終彙總造冊。送吏部存案。○三十二年覆准。僧人招受僧徒。必須披剃。若濫行招受。查出即行治罪。例有明條。今以無業之徒。託名帶髮出家。並不披剃。是以不僧不俗之身。潛居庵觀。最易藏姦。

飭令地方官實力稽查。如有此等髮僧。即勒令還俗。外來者驅逐回籍。俱責令編管為民。○三十三年議准。各省督撫嚴飭地方官申明禁令。不許私行簪剃。違例招徒。其在籍僧道。遵照保甲條例。每廟給予門牌。地方官同民戶一體查覈。○三十五年奏。京城官管各廟。除羣房圍房。素不供佛處。所許其租賃收息。以為黏補。及日用之費。其供佛正殿配廡。概不許擅行出租。違者治罪。並請交步軍統領督理街道各衙門。隨時稽查。參處。奉

旨依議。著於每年歲底具奏。○三十六年議准。各省如  
實在無戒僧。及清微靈寶道士。可以充補僧道  
官者。准其以曾受戒之應付僧。及住廟焚修之  
全真道士。報部充補。仍取具地方官印甘冊結  
咨部給劄。至邊僻州縣。既無住持僧道。聞有游  
方僧道。來去無常。為數諒亦無幾。該地方官督  
率保甲稽查。毋庸召募設官。○三十八年奏准。  
前經軍機處禮部奏請。將直省各府州縣僧道  
陰陽醫學等官印記撤回。停止鑄給。但各職俱  
有專司之責。凡出結具領等事。亦宜官給信守。

以昭慎重。嗣後照官刻佐雜鈐記之式。長二寸四分。闊一寸三分五釐。由藩司用官鋪內梨木。照依各職官鐫刻正字給發。○三十九年奏准。直省各府州縣。額設僧綱道紀等官。遇有缺出。例選領有牒照之僧道咨部充補。自牒照停止。頒給以來。選充無人。往往懸缺未補。或致將未給牒照之僧道充補。應交各該督撫轉飭地方官。查明現在僧尼道士。除已有牒照者毋庸換給外。其實心焚修。現無牒照。將年貌籍貫並所住寺廟。造具清冊。申詳該督撫。陸續咨部。分別

頒給牒照。其招受生徒。次第相傳。及遇事故。繳銷之處。俱照例辦理。並申嚴定例。此次清查以後。儘仍有無牒照而私自出家者。即按律治罪。仍將失察各職名送部議處。至各省僧道等官。懸缺未補者。俱令該督撫照例遴選咨部。或選補之人。向未領有牒照。仍令先行咨給。後再請補缺。○又奉

旨。僧道度牒。本屬無關緊要。而查辦適以滋擾。著永遠停止。其選充僧道官。令地方官查明具結辦理。○又諭。昨據御史奏請停查僧道度牒一摺。已降旨允行矣。

禮部請將乾隆四年以後未給度牒僧道。交地方官  
通查補給一事。止以備僧綱道紀等官之選。第度牒  
不過相沿舊例。散給仍屬具文。而稽查實虞煩擾。若  
防僧道滋事。未必有牒照者。悉能恪守清規。而犯法  
者。皆係私自簪剃。方今法紀森嚴。有犯必懲。更毋庸  
為此認認過慮。至遇僧綱道紀需人。所在地方官。原  
可查明僧道中之實在焚修戒法。嚴明者。具結呈報  
咨部。給照充補。何必因此一二人之補缺。而令各省  
寺院通查滋擾耶。所有充補僧道官。必須給有牒照  
之例。亦著停止。○四十一年奏准。各省每年造送僧



道四柱清冊。原備補放僧綱道紀等官。有所查考而設。向例僧道官缺出。必領有牒照者。方准充補。是以四柱冊內。惟將領過牒照僧道。及有招徒傳牒者。按名造報。今牒照既遵。

旨停止。其選充僧道官。不論曾否領有牒照。令地方官選實在焚修戒法嚴明者。取結咨補。是此等四柱冊籍。實屬具文。應即停止造送。至僧綱道紀等官。有稽察僧道之責。員缺毋庸懸曠。令各督撫飭查各屬。有懸缺未補者。即行選充。每歲底造具清冊。註明年歲籍貫。及補放日期。報部備

查如有半年以上懸缺不補者。查明揭參。再僧道等官。既令地方官出結咨補。如不定以處分。恐啟濫行保送之弊。嗣後如僧道官有犯事者。將結送之原官交部察議。○又奏准。裁道錄副印一缺。○四十五年

諭。僧人內有沙彌行腳等類。蓄髮披垂者。概令薙去。不准混留。又道士除作法事外。平日總用常人冠服。不得頭戴道巾。身穿道袍。○嘉慶四年

諭。嗣後京城內外官管廟宇。如外省赴京引見。及候補候選人員。原可任其居住。不必官為禁止。俾僧道等

亦得香火之資。惟外來游方僧道。及面生可疑來歷不明之人。必當實力稽查。斷不准容留。致令潛匿。仍於年終彙奏一次。不可虛應故事。有名無實。著為令。

○六年

諭嗣後除京城各官廟。照例不准招租外。所有私廟房。間仍准照舊出租。當飭令僧道等。將租住廟宇之人。查明來歷清楚者。方許容留。仍出具切實甘結。呈報地方官存案。備該僧道將來歷不明之人私自存留。一經犯案。必當按律懲辦。又奏准。各省僧道等官。有約束僧道之責。例由各該督撫咨部給劄。官

頒正字鈐記。其餘僧道所用篆隸戳印。係屬私  
行造刻。易滋煽惑。令各該地方官嚴行飭禁銷  
毀。違者分別究擬。○又奏准。

盛京道丁。多係流民及無主家奴充當。積久日增。  
若不官為稽查。不但藉此圖避差徭。且恐匪犯  
混迹其中。應將現在查出真實住廟服役道丁  
六百七十二戶。由

盛京禮部給予執照。仍交與道錄司管轄約束。以  
專責成。令

盛京禮部不時稽查。不得於現在載冊之外多增

一名致滋冒濫。其無著道丁二百十四戶。均令其充當。

陵寢祭祀之差。交與

盛京禮部六七品官稽查約束。至此項無著道丁。不准照禮部壯丁之例。與旗人一體居官考試。交產結婚。以示區別。○十七年

諭給事中甘家斌奏請禁止婦女入廟。以維風化。一摺。寺院庵觀。不准婦女進內燒香。本有例禁。京城廟宇叢多。或日久奉行不力。著步軍統領順天府五城出示曉諭。如有開設會場招搖婦女入寺者。一體查禁。

至所奏廟宇收留匪徒一節。各寺院開曠房屋。招租取利。在所不禁。但亦須分別良莠。若知情容留姦宄。一經發覺。將該僧道從重治罪。其所奏外省僧人置田招佃之處。亦著該地方官隨時稽查。毋令滋弊。○

又奏准嗣後

京師暨各直省僧道。有犯姦贓盜竊以及違例收徒之案。其該管僧道官。但失察不行舉報者。即加斥革。以重職守。○二十三年

諭禮部等衙門。年終彙奏稽察官管廟宇一摺。京城內外官管廟宇。禮部等衙門。每屆年終。俱以並無容留

來歷不明之人。並聲明殿廡亦無私行租賃等事。彙奏一次。幾成具文。各廟宇將空閒房屋租與來京官員人等暫住。事所常有。所應查者。恐有游方僧道。及來歷不明之人。湮迹其中。各該衙門務飭派出之員認真稽察。留心偵訪。一經查出。立即稟明究辦。不可虛應故事。止以一奏塞責。○道光二十四年議准。嗣後遇有僧道人等坐門募化。並作關募化。概行驅逐。如有訛索攪擾。一經拏獲。按其所犯情節。從嚴究辦。至穿掌釘腮各項惡化。比照恐嚇詐賴人。故自傷殘律。杖八十。分別咨送禮部內務

府僧錄司照擬發落。○又議准。

京城官管各廟住持。每兩月一次。出具並無容留  
來歷不明之人甘結。造具僧道及雇工名數年  
貌籍貫清冊二分。由僧道錄司彙總。鈐蓋印信。  
分送禮部。並步軍統領衙門查覈。○又議准。

京城僧官道官。分設各城。

僧官。東城南城西城北城。中城東城南城東城北城。

西城南路。凡八處。道官。東城東南城。西城西南城。北城。中城。凡六處。各置協理一

員。僧官兼善世等銜。道官兼正一等銜。給予部  
劄。協理給予司劄。缺出依品次升補。○三十年

七月



諭。此案薛執中以道士屢次改名易裝。藉醫招搖。行蹤詭祕。到處煽惑人心。所寫書信。擅議時政。妄談休咎。情詞尤為狂悖。即立正典刑。亦屬罪無可逭。惟念朕御極之初。法外施仁。稍從末減。薛執中著從寬定為斬監候。秋後處決。仍著刑部隨時查察。如該犯在監復有不法情事。即行奏明正法。

喇嘛禁例。○天聰七年定。喇嘛班第出居城外清淨之所。有請念梵經治病者。家主治罪。○又定。喇嘛班第有容留婦女。及不具呈報部。私為喇嘛建蓋寺廟者。治罪。○順治四年定。喇嘛不

許私自游方。有游方到京者。着發回原籍。○十八年題准。

京師內白塔居住喇嘛九名。什大達廟居住喇嘛八名。及額木齊喇嘛仍照舊留住外。其餘喇嘛班第均令於城外居住。如有擅自進城居住者。將喇嘛送刑部。照違法例治罪。○康熙六年議准。凡喇嘛班第。令該管大喇嘛逐日詳查。由部按月詳查。有請誦經治病。向大喇嘛處言明准去者。誦經畢。仍交還大喇嘛。○二十三年覆准。嗣後喇嘛所到處。不過三日。即令起程。違者留

住家長。寺廟住持。及失察官員。一併治罪。喇嘛除犯死罪外。所犯別罪。停其入官。仍照律治罪。遞解原籍。○又定。班第不許服用金黃色。黃色。伍巴什。伍巴。三察。不許服用金黃色。黃紅色。如上賜者。准用。違者治罪。○乾隆元年。

諭。從前部議給發僧道度牒一事。每歲給發數目。作何題奏。未經議及。恐有司視為具文。無從稽考。著各省將給過實數。及事故開除者。每年詳晰造冊報部。該部於歲終彙題。今年初次奉行。其題奏之處。著於乾隆二年為始。至番僧給發度牒。亦照此例行。○三十

五年議准。嗣後五臺等處喇嘛。前往普陀進香者。由該督撫咨明理藩院。轉咨兵部給發路引。仍令該管督撫轉咨浙省。飭令守口員弁查驗放行。回棹後。守口官弁驗明人數放進。呈報浙江巡撫。於年終將出入人數造具清冊。分送兵部並理藩院。以憑查覈。如出口人數與部發路引不符。將守口員弁照盤查不實例議處。三十九年奏准。停止番僧度牒。○道光二十七年諭。前據琦善奏。達賴喇嘛班禪額爾德尼。差人赴附京地方。辦買哈達緞疋等物。酌擬人馬騎馱數目一摺。

當交該部議奏。茲據奏稱。詳覈該大臣所擬。係體察該處實在情形。均著照該大臣原擬辦理。惟所帶人馬騎馱。既經酌定數目。以後應令永遠遵守。不得漫無限制。並著西甯辦事大臣。屆期詳察奏定章程。逐一稽查。儻日後擅自增添。即著據實參奏。

正一真人事例。乾隆四年議奏。嗣後該真人差委法員。前往各省開壇傳度之處。一概永行禁止。如有法員潛往各省考選道士。受錄傳徒者。一經發覺。將違禁之法員。嚴加治罪。該真人一併議處。十二年覆准。江西張氏。世居龍虎

山真人名號。非朝官卿尹之稱。存其舊名。正所以別於流品。前因無案可稽。兩遇

覃恩。加至光祿大夫。封及三代。邀榮逾分。理應更正。嗣後不許援引假借。題給

封典。至正一真人有統率龍虎山上清宮道衆之責。視提點演法稍優。按太醫院使秩正五品。醫巫類本相等。應將正一真人亦授為正五品。從前所用銀印。繳部換給。其真人承襲由來已久。不過令其奉祀宮觀。非若文武勳階。為

國家酬庸之典。爰及苗裔。以示顯庸者可比。嗣後

有缺應補。仍由該撫察其子孫應襲者。取具地方官印結咨部襲補。照道官例註冊。至於朝覲為述職大典。筵燕實惠下。

隆恩未便令道流廁身其間。即一概停止。以肅體制。  
○三十一年

諭正一真人。向係承襲一品。前據左副都御史梅穀成奏。請量加裁抑。經大學士會同該部議。覆降為五品。第念其宋元以來承襲已久。世守道教。即遇有過愆。亦應抵其人以罪。不應議及其世襲。然舊例一品。班序未免太優。遽降五品。又未免過於貶損。著加恩視

三品秩永為例。五十四年

諭正一真人嗣後著五年一次來京。嘉慶九年奏准龍虎山正一真人係三品職其所用印信乃係五品與現在品秩不符嗣後換給三品印信以符體制。二十四年

諭正一真人係屬方外原不得與朝臣同列嗣後仍照舊例一應朝覲筵燕概行停止。道光元年

諭瑞弼奏正一真人張鈺懇請來京叩謁一摺張鈺前經停其朝覲著不准來京。又定龍虎山上清宮設提點一員。從六提舉一員。從六副理二員。贊教



四員。

均七品。

知事十八員。

未入流。

缺出由正一真人

於本山道衆內揀選充補。如提點缺出由提舉  
以下各員挨次升補。均出具考語報部補放給  
劄。並於每屆年終造具各法官及道衆年貌籍  
貫清冊報明該省督撫咨部查覈。如正一真人  
有私鈐執照發給法官及用空白劄付向各省  
考選道士並容士民投充挂名等事該法官及  
投充之人從重治罪仍將正一真人職名咨送  
吏部議處。